

9 | 2019



# Rudar

LIST RMU "BANOVIĆI" / DECEMBAR 2019 / BESPLATAN PRIMJERAK

## SRETNO *u novoj 2020. godini*

IMPOZANTNI POSLOVNI REZULTATI UPRAVE DRUŠTVA  
U ŠESNAESTOGODIŠNJEM MANDATU

**INVESTIRANO PREKO 240 MILIONA KM,  
OSTVARENA DOBIT PREKO 46 MILIONA KM  
I ZAPOSLENO 1.848 NOVIH RADNIKA**





SVEČANA SJEDNICA UPRAVE I SINDIKALNE ORGANIZACIJE RMU „BANOVIĆI“ D.D. BANOVIĆI

## KONTINUITET USPIJEŠNOG POSLOVANJA NASTAVLJEN I U 2019. GODINI RUDNIK 16. GODINU ZA REDOM POSLUJE POZITIVNO



Svečana sjednica Uprave i Sindikalne organizacije rudnika Banovići u povodu 21. decembra dana rudara BiH i ove godine protekla je u duhu slavljeničkog raspoloženja, poslovnih uspijeha i velikih razvojnih planova. Ovom prilikom u sali Radničkog doma, kao podrška okupili su se brojni rudari, predstavnici privrednog, javnog i političog života kao i poslovni partneri, koji su imali priliku uživati u posebno osmišljenoj scenografiji i ugodnom kulturno-zabavnom programu.

Prije početka sjednice prisutni su položili cvijeće i odali počast na Centralnom spomen -obilježju šehidima i poginulim borcima, među kojima je i veliki broj banovićkih rudara.

Svečanost je simbolično počela pjesmom o rudarima, nakon čega je i prikazan kratki promotivni video o radu i razvoju Rudnika u poteklom periodu.

U uvodnom dijelu goste je pozdravio domaćin sjednice direktor rudnika dr. Munever Čeragić, koji je rudarima čestitao praznik i poželio uspijeh u daljem radu.

Da bez vrijednih rudara nema uspijeha u rudarskom sektoru dalo se zaključiti i kroz održani govor direktora Rudnika koji je naveo da Banovići Dan rudara slave kao najvažniji praznik u godini, jer banovićka snaga jeste Rudnik.

*-Zahvaljujući svima nama, ali posebno naporima rudara, njihovoj odgovornosti, istrajnosti i posvećenosti poslu i ove godine prevazišli smo teške izazove koji su stavljeni pred nas i poslovnu 2019. godinu završili u proizvodnom i finansijskom plusu. To govore i preliminarni rezultati koje ću ovom prilikom iznijeti. Ukupne količine proizvedenog separisanog uglja do kraja decembra iznosit će oko 1,6 miliona tona, a ove godine u mjesecu novembru, kada je proizvodnja uglja u pitanju, ostvarili smo velike rezultate i oborili svojevrsan rekord koji nije zabilježen u poslijeratnom periodu. Naime, novembarska proizvodnja je iznosila 183. 893 tona separisanog uglja, a ovako visok mjesečni rezultat proizvodnje posljednji put zabilježn je tek 1990. godine. Decembarska proizvodnja uglja i otkrivke takođe će ići iznad plana, što će na kraju i nadoknaditi zaostatak*







proizvodnje u proteklih 10 mjeseci i donijeti pozitivan finansijski rezultat. Proizvodnja otkrivke je na visokom nivou i dosegnut će planirani iznos od 12 miliona metara kubnih čvrste mase. Ono čime se svake godine posebno možemo pohvaliti jesu investiciona ulaganja, pa tako ni 2019. godina nije bila izuzetak kada je uloženo preko 50 miliona KM, te pokrenuto još 27 miliona KM investicija – rekao je Čergić.

Direktor je također u svom obraćanju istakao da rudnik Banovići danas zapošljava 2. 864 radnika, od čega 237 visokoobrazovanih kadrova, kojima se uredno izmiruju plate i redovno uplaćuju doprinosi. Osvrnuo se na nezavidnu situaciju u zadnjem dijelu godine kada su grčevitom borbom dobili „bitku“ u vidu zapošljavanja novih 156 radnika, koji su u Rudniku radili na određeno vrijeme, a čiji je posao zbog iznenadne i neobjašnjive odluke Vlade FBiH bio doveden u pitanje.

Poručio je i da rudnik Banovići ne odustaje od izgradnje termoelektrane te da je ovo privredno Društvo spremno za gradnju najvećeg projekta u energetskom sektoru od koga zavisi dugoročan plasman banovičkog uglja, a samim tim i opstanak građana Banovića.

Sjednica je nastavljena svečanom ceremonijom dodjele nagrada „Zaslužnim članovima Društva“, kao i nagrada za „Doprinos u radu Društva“ u 2019. godini. Plakete „Zaslužnim članovima Društva“ za ovu godinu uručio je direktor dr. Munever Čergić, dok je „Plakete



za doprinos“ u radu za 75 radnika uručio direktor za tehničke poslove dr. Ibrahim Lapandić.

Sindikalna organizacija rudnika mrkog uglja “Banovići” također je u povodu 21. decembra Dana rudara BiH dodjelila kolektivna i individualna priznanja.

Priznanja “ZLATNI UGLJEN” i “BANOVIĆKI RUDAR” dodjeljuju se institucijama i istaknutim pojedincima za bezuslovnu podršku opstanku i razvoju rudnika “Banovići”, koji svojim odlukama, radom i posebnim zalaganjem doprinose očuvanju radničkih prava i rudarskog poziva kao egzistencijalnog zanimanja ove Općine.



Priznanja je uručio predsjednik Skupštine sindikata Rudnika, Zijad Lačić.

**Pomenuta priznanja su određena satisfakcija kako institucijama tako i pojedincima za dati doprinos u razvoju Rudnika, a da ne bi bila umanjena njihova istinska vrijednost i značaj, veoma bitno je napomenuti da se uz ista ne dodjeljuju novčana sredstva, što je inače uobičajna praksa prilikom dodjele priznanja.**

Nakon uručivanja priznanja predsjednik Skupštine sindikata Rudnika se i obratio prisutnima, te govorio o nezadovoljavajućem statusu rudara u FBiH, kao i o pregovorima koje ovih dana vode sa Vladom FBiH oko Kolektivnog ugovora iz oblasti rudarstva. Sindikalna organizacija rudnika Banovići u tim pregovorima ima jasan stav, koji kaže da ni po koju cijenu neće odustati od zahtjeva vezanih za povećanje najniže cijene satnice rada, te da će u tome istrajati do kraja i boriti se svim zakonskim sredstvima. Takođe se čvrsto drže i stava da rudnik Banovići ni pod kojim uslovima ne želi ući u Koncern EPBiH.

Tradicionalno se na ovoj svečanosti uručuje i pehar sveukupnim pobjednicima radničkih sportskih igara, kao i nagrade pobjednicima konkursa literarnih i likovnih radova organizovanog u osnovnim i srednjim školama.

Dan rudara u Banovićima obilježen je velikim brojem kulturno - zabavnih aktivnosti koje su 21. decembra okončane spektakularnim vatrometom.



LAUREATI 2019. GODINE

# NA SVEČANOJ SJEDNICI UPRAVE DRUŠTVA URUČENA PRIZNANJA ZA 82 UPOSLENIKA



Zbog izuzetnog zalaganja u radu i doprinosa u ostvarivanju radnih zadataka ove godine nagradu počasna zvanja i priznanja dobila su **82 radnika**. Plakete i nagrade kao i do sada dodjeljivale su se u dvije kategorije i to "Plaketa zaslužni član Društva" i "Plaketa za doprinos u radu Društva".

**Počasno zvanje "Zaslužni član Društva" dobili su:** Admir (Šahim) Ćosić, Esed (Abdulah) Lapandić, Mirsad (Salih) Dobrinjić iz pogona "Površinska eksploatacija uglja", dok su iz pogona "Podzemna eksploatacija uglja" ovogodišnji Zaslužni članovi društva: Nermin (Šaban) Demirović i Fahrudin (Hasan) Aganović.

Ovu prestižnu nagradu iz pogona "Separacija" dobio je Osman (Ahmet) Poljić, a iz pogona "Željeznički transport" Mehemed (Halil) Kovačević.

Nagrade na svečanoj sjednici dobitnicima je uručio direktor Rudnika dr. Munever Čerčić.



**Plakete za doprinos u radu Društva i ostvarenju planskih zadataka dobila su 23 uposlenika pogona "Površinska eksploatacija uglja" i to:** Mr Senad (Hasan) Čerčić, Mirsad (Mujo) Mešanović, Galib (Agan) Borovačkić, Idajet (Salih) Smajlović, Senahid (Smajo) Brigić, Asmir (Habib) Čamdžić, Suad (Ramo) Ahmetović, Admir (Alija) Kovačević, Alija (Hasan) Bajrić, Senad (Ramo) Mujkić, Zahid (Ramo) Bojić, Fatka (Suljo) Nurković, Senad (Fadil) Turić, Safet (Suljo) Pozderović, Kasim (Suljo) Modrić, Juso (Džemal) Lapandić, Elvis (Hajrudin) Muhamedbegović, Derviš (Ramo) Brčaninović, Fikret (Muharem) Lapandić, Muzafer (Rasim) Husić, Muzafer (Hašim) Kahvedžić, Mustafa (Mehmed) Salanović, Bajro (Muharem) Brigić.

**Iz pogona "Podzemna eksploatacija uglja" priznanje za doprinos u radu dobilo je 16 uposlenika:** Nerdin (Šahim) Pozderović, Muriz (Izet) Salihbašić, Šemsudin (Šaban) Đerzić, Munib (Osman) Taletović, Nihad (Hasan) Mešanović, Admir (Munib) Bojić, Mehmed (Safet) Karahodžić, Suljo (Mujo) Okačić, Dževad (Mustafa) Avdić, Ekrem (Husein) Šahbazović, Elvir (Ibrahim) Hasić, Zijad (Nezir) Hasić, Adem (Salih) Hasić, Munever (Osman) Sarić, Mersudin (Šemso) Idrizović, Samir (Vejsil) Osmanović.

**Iz pogona "Separacija" Plaketu je dobilo 11 uposlenika:** Safet (Ibrahim) Bećarević, Muhamed (Redžo) Čehajić, Asmir (Feriz) Bešić, Sead (Mustafa) Mehmedanović, Nihad (Mustafa) Lačić, Muradif (Mustafa) Dostović, Salim (Osman) Čolić, Ifet (Ibrahim) Mešanović, Samir (Izet) Smajlović, Fahrudin (Ramadan) Pozderović, Hajrudin (Munib) Lević.



**Ove godine pogon "Željeznički transport" imao je 8 dobitnika ovog značajnog priznanja:** Osman (Redžep) Mujarić, Redžo (Muharem) Brigić, Nijaz (Džemil) Čolić, Meho (Salih) Brčaninović, Vehid (Fehim) Zejnić, Munib (Zaim) Saletović, Muharem (Ibro) Kahrmanović, Zijada (Edhem) Ivanišević.



**U pogonu "Direkcija" Plakete je dobilo 13 uposlenika:** Halid (Rahman) Rahmanović, Hanifa (Mujo) Husić, Mehmedalija (Mehmed) Berbić, Nedžad (Halil) Nurković, Šahsena (Sabit) Karić, Hasan (Mehmed) Lačić, Zineta (Nuraga) Džinić, Slavica (Mile) Jurić, Mirsad (Husein) Čičkušić, Mugdin (Munib) Husić, Jasminka (Izudin) Gutić, Senahid (Nezir) Osmić, Džemal (Sadik) Djedović.

Priznanje „Zlatni ugljen“ za 2019. godinu dodjeljen je Općinskom vijeću Banovići koje je svojim odlukama podržalo rast i razvoj RMU „Banovići“, a priznanje je u ime Općinskog vijeća Banovići primio Nermin Delagić, predsjedavajući Općinskog vijeća.



**Pogon "Standard i usluge" ove godine ima 4 dobitnika Plaketa za doprinosu u radu:** Kemal (Džemal) Mehičić, Vasiljka (Miloš) Petrović, Mirzeta (Semiz) Bojić, Esma (Alija) Kasumović. Plakete za doprinos u radu nagrađenima je dodijelio direktor za tehničke poslove Rudnika, dr. Ibrahim Lapandić.

Svi dobitnici osim plaketama, nagrađeni su i novčanim naknadama u skladu sa aktima Društva.



Priznanje „Banovički rudar“ Odlukom Sindikalne organizacije RMU „Banovići“ d.d. Banovići dobili su: Midhat Husić (načelnik općine Banovići), Elzina Pirić (poslanik u Predstavničkom domu Parlamenta BiH), Safer Demirović (poslanik u Predstavničkom domu Parlamenta BiH), Emin Haračić (predsjednik Nadzornog odbora RMU „Banovići“), Antun Luburić (član Nadzornog odbora RMU „Banovići“), Fertik Glibanović (sekretar Sindikalne organizacije RMU „Banovići“).





ZNATNO PREBAČEN MJESEČNI PLAN PROIZVODNJE UGLJA

## U NOVEMBRU ZABILJEŽENA REKORDNA PROIZVODNJA UGLJA U POSLJEDNJIH TRIDESET GODINA



Rudari rudnika Banovići svoj ovogodišnji praznik dočekali su u dobrom raspoloženju obzirom da godinu završavaju sa značajnim količinama iskopanog uglja, posebno u zadnjem dijelu godine. Naime, u mjesecu novembru uspjeli su oboriti i rekord kada su iskopali čak 183.893 tone separisanog uglja, što nije zabilježeno u poslijeratnom periodu. Prilično visoke mjesečne planove prebacili su za 25% u čemu ih nisu

spriječili ni otežani zimski uslovi rada. Važno je napomenuti da je za 20% prebačena i prošlogodišnja novembaska proizvodnja uglja, koja je takođe bila iznad plana, što je svakako dokaz kontinuiranog napetka.

Izvanredne rezultate na proizvodnji uglja pratila je i realizacija otkrivke, pa je u mjesecu novembru proizvedeno 1.066.560 metara kubnih čvrste mase, odnosno 21% više u odnosu na plan.

Dobri proizvodni rezultati nisu slučajni, prethodila im je temeljna priprema, dobra organizacija kao i nešto povoljniji vremenski uslovi u ovom periodu.

Iako je dobrim dijelom godine bilo složene situacija i zastoja na proizvodnim pogonima, kao i uplitanja politike u rad i razvoj preduzeća, radnici su i u takvim uslovima sproveli planirane aktivnosti i svoju energiju usmjerili na ono što je najbitnije, a to je proizvodnja uglja. Kraj godine donio je stabilizaciju i dobre rezultate koji su jasni indikatori za pozitivno poslovanje i ostanak Rudnika Banovići na liderskoj poziciji.

## DECEMBAR NASTAVLJEN ISTOM PROIZVODNOM DINAMIKOM

Ako je suditi po dosadašnjim rezultatima mjesečni planovi na proizvodnji uglja i otkrivke biće prebačeni i u decembru. Za dvadeset i tri dana mjeseca decembra proizvedeno je 125.577 tona separisanog uglja, što je 107% od plana i realizovano 592.270 metara kubnih čvrste mase.

Prema procijenama tehničkog direktora Rudnika, Ibrahima Lapandića, decembarska proizvodnja biće oko 160 hiljada tona separisanog uglja. Iako se

očekuju lošiji vremenski uslovi, niske temperature i mržnjenje, proizvodnja uglja bi u svakom slučaju trebala premašiti ionako visoki plan za ovo doba godine od 157.000 tona. Posebne problematike trenutno nema ni na jednom proizvodnom pogonu pa su projekcije ovakvih rezultata realno utemeljene.





AKTIVAN PROCES MODERNIZACIJE RUDNIKA

# INVESTICIONA ULAGANJA U 2019. GODINI 75 MILIONA KM



Da se samo konstantnom nabavkom nove neophodne mehanizacije iz godine u godinu može očekivati tendencija rasta proizvodnje uglja i otkrivke, poslovna je politika kojom se već godinama vodi rukovodstvo ovog Rudnika. Ni u 2019. nije se odstupalo od tih stavova, pa se intenzivno radilo na investicionim projektima značajnim za proizvodni proces, od kojih su neki realizovani do kraja, dok su drugi u fazi realizacije.

Izgradnja transportnog sistema za odvoz jalovine na površinskom kopu „Turija“ svakako je vrijedan projekat, ne samo zbog velikog ulaganja, nego zbog onoga što će po završetku izgradnje donijeti proizvodnom procesu Rudnika. Izrada transportnog sistema koštat će oko 55 miliona KM, a prema procijenama biće završena do 2022. godine, kada će kapacitet proizvodnje biti znatno povećan.

Do sada je u prvoj fazi izgradnje investirano oko 30 miliona KM, nabavljene su drobilice, a u ovoj godini pokrenuta je i nabavka odlagača za transportni sistem u iznosu od 13,5 miliona KM, kao i veznog transportera za odvoz jalovine na površinskom kopu Turija, u vrijednosti od 4 miliona KM.

U sklopu ovogodišnjih realizovanih investicija su i dva bagera marke Liebherr koji su početkom godine stigli na rudničke kopove, a čija vrijednost iznosi 13 miliona KM, kao i mašina taložnica na Separaciji u vrijednosti od 2 miliona KM. Istu vrijednost imali su i grabuljasti i trakasti transporter nabavljeni za potrebe podzemne eksploatacije uglja.

Ove godine investirano je i u projekat izgradnje JUG-a 4 u jami „Omazići“ dužine 1332 metara. Nakon što je urađen ulaz, početkom naredne godine se planira montirati kombajn koji je takođe u sklopu ovogodišnjih investicija nedavno nabavljen, te krenuti sa izradom niskopa. U niskopu će biti ugrađen transportni sistem, te nabavljena lokomotiva i šine za spuštanje radnika. Cijena izgradnje niskopa procjenjuje se na oko 5 miliona KM.

**Ukupno završene investicije u 2019. godini iznose 50 miliona KM, dok su pokrenute investicije u iznosu od 27 miliona KM.**

U cilju povećanja kapaciteta proizvodnje, a poučeni pozitivnim iskustvom iz 2013. godine, u investicionom planu za 2020. godinu našla se i nabavka još jednog mehanizovanog čela u jamu, vrijednosti preko 20 miliona KM.

Kada je u pitanju ova investicija, osim velike produktivnosti, isplativosti i humanizacije na radu, veliki plus je i činjenica da radnici Rudnika već sada posjeduju veliko iskustvo u radu, pa prebacivanje širokog mehanizovanog čela iz jednog otkopnog polja u drugo obave za 28 dana.

Po završetku kapitalnih investicija, odnosno ugradnje transportnog sistema na površinskom kopu Turija i ugradnjom još jednog širokog mehanizovanog čela u jamu, Rudnik će 2022. godine biti u mogućnosti proizvesti oko 2,5 miliona tona separisanog uglja, što je i krajnji cilj pomenutih ulaganja.





IMPOZANTNI POSLOVNI REZULTATI UPRAVE DRUŠTVA U ŠESNAESTOGODIŠNJEM MANDATU

## INVESTIRANO PREKO 240 MILIONA KM, OSTVARENA DOBIT PREKO 46 MILIONA KM I ZAPOSLENO 1.848 NOVIH RADNIKA



Impozantan je podatak da je rukovodstvo rudnika Banovići u proteklih 16 godina u investicioni razvoj preduzeća uložilo preko 240 miliona KM, osiguranih uglavnom vlastitim sredstvima. Od 2004. godine povlačeći prave investicione poteze prije svega na obnovi i nabavci mehanizacije, ovo preduzeće danas važi za jedan od najsigurnijih rudnika koji radi sa najmodernijom opremom. Tokom godina na kopove su stizali bageri, damper kamioni buldozeri, pomoćna mehanizacija, te je svaka godina obilježena bar jednim kapitalnim ulaganjem koje znatno unaprijedi proces proizvodnje. Podzemna eksploatacija uglja je u potpunosti prešla na mehanizovani način rada, a 2013. godine ugradnjom širokog mehanizovanog čela počinje nova era jamskog otkopavanja.

Visokoproduktivna investicija brzo je dala rezultate, pa se po proračunima može konstatovati da je do sada pomoću mehanizovanog čela proizvedeno oko 2 miliona tona uglja. Važan podatak jeste od 16 godina proizvedeno je uglja u vrijednosti preko 2 milijarde KM.

Kolektiv od skoro tri hiljade zaposlenih svih ovih godina išao je uzlaznom putanjom. Plate radnika su redovno isplaćivane sa konstantnim rastom i u nadprosječnom iznosu.

Takođe svih ovih godina Rudnik redovno izmiruje obaveze prema državi. Od 2004. godine do danas na osnovu poreza i doprinosa, obaveza uplate PDV-a i ostalih naknada (koncesija, doprinosa za šume, turističke zajednice i sl.) državi je od strane rudnika Banovići uplaćeno preko 530 miliona KM.

Ni u jednom momentu u pomenutom periodu poslovanja Rudnik nije doveden u situaciju da ima blokirane račune, da nije u stanju isplatiti plate radnicima, uplatiti doprinose za penziona i zdravstveno osiguranje, što se nažalost znalo dešavati u drugim rudnicima.

Ovo rukovodstvo konstantno je upošljavalo nove radnike i onda kada je većina preduzeća uručivala otkaze. Za svog mandata uposlili su 1.848 novih radnika, a prije devet godina povukli su potez vrijedan hvale, zaposlivši mušku djecu banovičkih šehida i poginulih radnika.

Ovako ohrabrujući podaci trebaju biti izazov za nadolazeće generacije, koje u budućnosti moraju da iznesu sav teret ovog posla i preduzeće nastaviti voditi ka vrhu.

Za sve ove godine truda i rada rudarima i ljudima koji vole ovaj Rudnik i ovaj grad, a koji prije svega vole svoj posao, nije ponestalo motivacije za nove podvige, pa se tako već za narednu godinu najavljuju veliki proizvodni i investicioni planovi, te maksimalna angažovanost na poboljšanju standarda rudara.





POČELA IZGRADNJA TRANSPORTNOG NISKOPA JUG 4 U JAMI OMAZIĆI

## ZAVRŠENA IZRADA PRISTUPNOG PUTA I IZGRAĐEN ULAZNI PORTAL



Sredinom mjeseca decembra završeni su i prvi radovi na izgradnji glavnog transportnog niskopa JUG 4 podzemne eksploatacije uglja, odnosno novog ulaza u jamu Omazići, koji će biti izgrađen u dužini od 1332 metra, a imat će funkciju izvoza uglja iz jame, dopremu operme i repromaterijala u jamu, a ujedno će biti i put za ulaznu zračnu struju i kretanje radnika. Glavni razlog izgradnje JUGA-a 4 jeste planirano povećanje kapaciteta proizvodnje u jami, u vrijeme kada u njoj budu radila dva mehanizovana široka čela, jedno u Zapadnom, drugo u Sjevernom reviru, zbog čega je neophodan novi niskop otvaranja jame sa znatno većim svijetlijim profilom.

Ono što je do sada urađeno na ovom projektu jeste zacjeljivanje odvodnog kanala u dužini 100 metara i izrada pristupnog puta do ulaznog portala. Ulazni portal urađen je u dužini od 30 metara na kome se trenutno vrše radovi na izolaciji i skidaju oplata. U narednom periodu bi se mogao montirati kombajn R-



130 i kada vremenske prilike to dozvole, krenuti u konačnu izradu niskopa. Sve dosadašnje poslove, ali i one koji se planiraju do samog završetka projekta, rade isključivo uposlenici Rudnika. Ono što je planom predviđeno da se uradi tokom ove kalendarske godine je i završeno, a već početkom naredne godine, kada se izvrši postavljanje kompresora, električnog postrojenja i nabavka podgrade, kreće se u realizaciju izrade niskopa. Izgradnjom niskopa stvorit će se realni uslovi za povećanje proizvodnje koja se planira nakon izgradnje termoelektrane u Banovićima. Po dosadašnjim prognozama proizvodnja u jami u tom periodu trebala bi se povećati na 800.000 tona uglja na godišnjem nivou. Niskop širine pet metara, u kojem će biti ugrađen transportni sistem, dizel lokomotiva i trakasti transporter, prema procijeni koštati će oko 5 miliona KM, a planirano vrijeme izgradnje je dvije godine.





## NAKON PROBLEMATIČNOG PERIODA TOKOM GODINE, STANJE PROIZVODNJE U JAMI SE STABILIZUJE



Od samog početka tekuće godine proizvodnja uglja u Podzemnoj eksploataciji bila je otežana, radilo se u teškim uslovima otkopnog polja Z1/3 koji su osim na proizvodnju uglja uticali i na vremenski rok otkopavanja. U mjesecu julu oprema je prebačena u novo otkopno polje Z8, u kome se proizvodnja trenutno odvija. Bolji uslovi rada u otkopnom polju Z8 odmah su dali rezultate pa se proizvodnja u avgustu, septembru i oktobru značajno povećala. U mjesecu novembru proizvedeno je 47.785 tona separisanog uglja, odnosno 107, 6 % od planiranih količina. Trenutno se radi i na pripremi novog otkopnog polja Z4 koje će biti završeno do mjeseca aprila naredne godine. Pretpostavke su da će uslovi rada u otkopnom polju Z4

biti izuzetno povoljni, a u prilog tome govori i činjenica da je u susjednom otkopnom polju Z3, u kome se ranije radilo, jamska proizvodnja uglja bila najbolja, kada se dnevno znalo proizvesti i do 3.000 tona separisanog uglja. Uporedo sa pomenutim poslovima radi se i na istraživanju Sjevernog revira, odnosno istražne prostorije IP3, nakon čije izrade se završava sa projektom istraživanja, te pristupa izradi projekta otvaranja Sjevernog revira. Otvaranjem Sjevernog revira i ugradnjom novog mehanizovanog čela, koje se u narednom periodu planira nabaviti u jamu, istovremeno bi se vršilo otkopavanje i u Sjevernom i u Zapadnom reviru, a tom dinamikom rada zasigurno bi bilo moguće ostvariti proizvodnju od 800.000 tona separisanog uglja. U podzemnu eksploataciju i ove godine su izvršena značajna investiciona ulaganja. Osim investiranja u izgradnju JUGA-a 4, nabavljen je i čelni grabuljar vrijednosti od 1 100 000 KM, koji je montiran i radi na proizvodnji u otkopnom polju Z8, kao i određene količine pruge za dizel lokomotivu u vrijednosti od 1 000 000 KM. Takođe je toku i nabavka četiri grabuljasta transportera, dva DGT - 440 i dva DGT - 616, kao i kompresorskog postrojenja sa potrebnom opremom, te mašina za pranje i sušenje veša.

Prema riječima tehničkog rukovodioca podzemne eksploatacije, Dževada Dostovića, proizvodnja u jami bi u narednoj godini trebala biti znatno bolja, uzmu li se u obzir povoljniji uslovi u otkopnim poljima, kao i najavljene investicije u narednoj godini.





NAKON OTEŽANOG PROIZVODNOG PROCESA I NEISPUNJENJA PLANIRANIH ZADATAKA POGON SEPARACIJA DOBIO NOVO RUKOVODSTVO

## PRAVOVREMENI POTEZI DALI IZUZETNE REZULTATE

Pored stabilizacije i rekordnih proizvodnih rezultata u zadnja dva mjeseca, godina na izmaku ostaće upamćena i po složenim problemima na proizvodnim pogonima. Najviše problema tokom godine bilo je na Separaciji. Stalni kvarovi u mjesecma najveće potražnje za ugljem bili su osnovni razlog neostvarenih zacrtanih planova proizvodnje.

To je bio i svojevrsan alarm za uzbunu i dovoljno dobar razlog da se dužnosti razriješe vodeći ljudi pogona, koji nisu imali prava rješenja za novonastalu situaciju i postavili novi koji će pokušati stabilizirati stanje. To se u konačnici i desilo. Od prvog dana mjeseca novembra, nakon smjene rukovodioca, proizvodnja je krenula i više nego dobro, oboreni su i proizvodni mjesečni rekordi, a do današnjeg dana na tom pogonu nema većih problema, proizvodi se iznad planiranih vrijednosti.

Kroz razgovor sa novim rukovodiocem pogona Separacije, Mensurom Gutićem, moglo se zaključiti da do većih promjena u proizvodnom procesu nije došlo, niti se značajnije promijenio kvalitet uglja. Kako kaže promjenila se samo svijest uposlenika, od rukovodioca do fizičkih radnika. Ozbiljnije se pristupilo poslu, bolja je angažovanost, i nadzor nad radnicima je maksimalno povećan. A kada se tako radi rezultati moraju biti vidljivi.

Obzirom da se na Separaciji vrši i najsloženiji proces proizvodnje sasvim je normalno da dolazi do određene problematike, ali ovaj put kvarovi se detektuju na



vrijeme i otklanjaju u najbržem roku. Svakodnevno se vrši pregled najkritičnijih strojeva kako bi se u momentu moglo reagovati, dok su ponedjeljak i petak planski predodređeni za remonte na ovom pogonu. Da bi se proizvodnja održala na dosadašnjem nivou i spriječili veći zastoji potrebno je zamijeniti dotrajale strojeve i dijelove strojeva, pa je zbog toga već na početku naredne godine planirana zamjena sita 202b, a u nešto dugoročnijem planu je i zamjena drobilica 133 a i b. Pomenutom zamjenom osim što bi se značajno povećala proizvodnja, smanjili bi se zastoji i zaštitili strojevi.





GENERACIJA KOJA JE OBILJEŽILA JEDNO VRIJEME

# U ZASLUŽENU PENZIJU ISPRAĆENO 69 RADNIKA



U prostorijama Radničkog doma uz ručak i muziku i ove godine organizovana je svečanost za 69 radnika Rudnika koji su u toku 2019. godine stekli uslove i ostvarili pravo na penziju.

U znak iskrene zahvalnosti na datom doprinosu, radu i naporu koji su decenijama ulagali u razvoj i stabilnost preduzeća, na samom početku druženja prisutnima se obratio Emir Rahmanović, predsjednik komisije za ispraćaj penzionera.

U ime kolektiva i u svoje lično ime penzionerima je uputio čestitke uz želju da u zasluženoj penziji dugo uživaju.

Takođe je u ime domaćina uručio i prigodne poklone koji su rudnička tradicija, obzirom da ručne satove sa posvetom i rudarske štapove penzionisani radnici u znak sjećanja dobijaju decenijama unazad.

U zasluženu penziju i ove godine otišli su kopači, vozači dampera, rukovodioci i majstori održavanja rudarskih mašina, ali i konobari.

Grupa dojučerašnjih rudara odradila je dobar posao, neki uz pomoć beneficiranog staža, neki radeći puni radni vijek, a zajedničko im je to što će svi biti dio historije Rudnika, iz koga nose lijepe uspomene.

Dobar dio njih ovaj dan dočekuje s veseljem, drugi pak s dozom nostalgije, ali svi u razgovoru naglašavaju da sve stečeno kroz radni vijek duguju isključivo Rudniku.



Meho Blažević

Mehmedalija Zejnilović

Džafer Rahmanović

Meho Blažević od prvog do posljednjeg dana radio je u jami „Omazići“. Davne 1988. godine počeo je raditi kao kopač, da bi uz savjestan, odgovoran i častan rad kroz godine napredovao i u penziju otišao sa mjesta rukovodioca. Na radnom mjestu je, kako kaže, vazda bio cijenjen i poštovan, kako od strane kolega, tako i od strane nadređenih. Zbog toga i nostalgija za prošlim danima, ali i nada da će se druženje sa bivšim kolegama nastaviti i dalje, posebno sada kada imaju više slobodnog vremena.



Na trenutak se svojih početaka prisjetio i Džafer Rahmanović, koji je takođe radni vijek proveo u jednom pogonu. Radnik Separacije je od 1978. godine. Za svoj dugogodišnji rad je, kako kaže, mnogo puta nagrađen. Svojevremeno je proglašavan i za Zaslužnog člana društva, istaknute nagrade koju Rudnik svake godine dodjeljuje najboljim pojedincima.

Ono na što je posebno ponosan jeste činjenica da je radni vijek odradio bez ijedne povrede i da danas u penziju ide sa dobrim zdravljem. Kako kaže u Rudniku ima dosta čestitih i dobrih mladih radnika koji će u budućnosti nastaviti da razvijaju ovo preduzeće.

„Nema boljeg rudnika od našeg. Plaće, regres i višak smo godinama unazad dobijali na vrijeme, što je rijetkost u mnogim preduzećima. U penziju danas idemo sa redovno uplaćenim doprinosima, tako da u miru možemo čekati i prve čekove“. – kaže Mehmedalija Zejnilović, penzionisani radnik pogona Standard i usluge, te dodaje kako će mu kolege nedostajati, ali nove životne navike i poslovi će upotpuniti slobodno vrijeme.





U POVODU DANA RUDARA

## ORGANIZOVAN PRIJEM ZA 76 PORODICA RUDNIČKIH ŠEHIDA



Članovi porodica šehida i poginulih boraca rudnika Banovići i ove godine, u sklopu obilježavanja 21. decembra Dana rudara BiH, okupili su se na jednom mjestu i odali počast svojim najmilijim.

Polaganjem cvijeća i učenjem fatihe na Centralnom spomen-obilježju prisjetili su se onih koji su dali živote za slobodnu domovinu u kojoj danas živimo.

Prema riječima Emira Rahmanovića, predsjednika komisije za prijem porodica, ovaj događaj postao je tradicija i svake godine upravo prijemom porodica šehida i porodica poginulih radnika, započinje

program obilježavanja Dana rudara u banovićkom rudniku. Takođe napominje da se briga o ovoj populaciji ne svodi samo na jedan dan, već da Rudnik godinama aktivno radi na poboljšanju njihovog socijalnog statusa prije svega zapošljavanjem i stipendiranjem njihove djece.

Ovom prilikom porodicama je uručena simbolična novčana pomoć i organizovan ručak, kako bi zajedničkim druženjem i razgovorom ublažili bol za svojim najmilijim, koji nikada neće biti zaboravljeni.





NAKON DUGOTRAJNE PRIPREMNE PROCEDURE

# ZAPOČETA IZGRADNJA NOVOG ŠKOLSKOG OBJEKTA U BANOVIĆI SELU



Nakon što su prethodno ispunjeni svi potrebni uslovi, izgradnja novog školskog objekta u Banovići Selu zvanično je počela 23. decembra tekuće godine, kada je Nadzorni organ IPISA Institut Sarajevo u posao uveo izvođača radova GD Konstrukcije Mostar.

Prema planiranoj dinamici radova, rok za izradu I faze objekta je 18 mjeseci. Dotrajali školski objekat, koji se nalazi na nesigurnom mjestu za ovaj kolektiv, odnosno u neposrednoj blizini rudničkog kopa „Turija“, biće zamjenjen sa potpuno novim modernim objektom. Novi objekat biće izgrađen u sredini naseljenog mjesta Selo II, u mjesnoj zajednici Banovići Selo”, na mnogo sigurnijem mjestu za buduće generacije osnovaca iz Banovići Sela i Pribitkovića.

Izgradnja škole koštati će 2.671.677 KM, a sredstva su obezbijedena kroz ugovor o eksproprijaciji sa rudnikom Banovići u iznosu od 2.171.677 KM, te Vladom TK u iznosu od 500.000 KM.

Podsjećamo, u proces izgradnje novog školskog objekta krenulo se eksproprijacijom rudarskog zemljišta Rudnika mrkog uglja „Banovići“, čije se eksploataciono polje, kako je već spomenuto, nalazi stotinjak metara od škole. Poslije izrade projekta i prikupljanja velikog broja dozvola, saglasnosti i elaborata, nedavno potpisan i ugovor sa izvođačem radova, te u konačnici i započeta izgradnja objekta.

Kako je planirano, do početka školske 2001/2022. godine učenici Osnovne škole Banovići Selo mogli bi sjesti u klupe potpuno novog školskog objekta koji će pružiti znatno bolje uslove rada kolektivu od 270 učenika i nastavnika.





SPORTSKA TAKMIČENJA POVODOM DANA RUDARA PONOVO BEZ IZNENAĐENJA

# POVRŠINSKA EKSPLOATCIJA UGLJA I OVE GODINE NA TRONU

Sportisti „Površinske eksploatacije uglja“ ponovo su sveukupni pobjednici takmičenja organizovanog u sklopu programa obilježavanja 21. decembra Dana rudara BiH. Već nekoliko godina unazad ekipe ovog pogona prelazni pehar „sebično“ drže u svojim vitrinama.

U fantastičnoj atmosferi kakvu samo rudari znaju napraviti, nepune dvije sedmice na sportskim terenima nadmetalo se u pet različitih disciplina. Takmičenja u malom nogometu, povlačenju konopca, stonom tenisu, kuglanju i šahu privukli su pažnju velikog broja posjetilaca, koji su imali priliku uživati u fer i korektnom nadmetanju, a na kraju finalnih utakmica i u ceremoniji proglašenja pobjednika i dodjeli priznanja. Kako su ovo već sada tradicionalne sportske igre, sudeći po rezultatima u zadnjih nekoliko godina i sveukupni pobjednik igara postaje tradicija. Viceprvaci ovogodišnjeg takmičenja u sveukupnom poretku bile su ekipe „Podzemne eksploatacije uglja“, dok su treće mjesto osvojile ekipe „Separacije“.



Posmatrajući poredak po disciplinama prvo mjesto u malom nogometu osvojila je ekipa „Površinska eksploatacija uglja“, drugo mjesto u ovoj disciplini pripalo je ekipi „Direkcije“ a treće „Podzemnoj eksploataciji uglja“. Za najboljeg strijelca proglašen je Adnan Džinić, za najboljeg golmana Nedim Husić, dok je najbolji igrač ovogodišnjeg takmičenja bio Ermin Mujarić.



Disciplina koja svake godine izazove najviše pažnje posjetilaca je povlačenje konopca, a prvo mjesto, nakon čvrste borbe, osvojila je ekipa „Podzemne eksploatacije uglja“, drugo „Separacija“, dok je treće mjesto pripalo „Površinskoj eksploataciji uglja“. Najbolji konopaš je Jasmin Đedović.

Šahisti Separacije osvojili su prvo mjesto, a iza sebe su ostavili ekipu „Željezničkog transporta“, odnosno „Površinske eksploatacije uglja“. Za najboljeg šahistu 2019. godine proglašen je Senad Beširović.

Najbolji pojedinac u stonom tenisu bio je Admir Dostović iz „Podzemne eksploatacije uglja“, čija ekipa je i osvojila prvo mjesto u ovoj disciplini. Drugo mjesto pripalo je „Direkciji“, a treće „Separaciji“.

„Podzemna eksploatacija uglja“ bila je najbolja i u kuglanju, dok je „Separacija“ osvojila drugo mjesto. Treće mjesto u ovoj disciplini pripalo je „Površinskoj eksploataciji uglja“. Najboljim pojedincem proglašen je Samid Suljić.

Pehar sveukupnom pobjedniku na Svečanoj sjednici uprave Društva dodijelio je predsjednik Skupštine sindikalne organizacije Rudnika, Zijad Lačić.





U POVODU DANA RUDARA

# ODRŽAN MALONOGOMETNI TURNIR ZA DJECU FK "BUDUĆNOST BANOVIĆI" PRVI U GRUPI DJEČAKA ROĐENIH 2010. GODINE

Proteklog vikenda u sportskoj dvorani Banovići u povodu Dana rudara održan je 5. po redu malonogometni turnir za djecu uzrasta 2009. i 2010. godišta.

I ovaj put domaćin sportskog događaja bila je škola fudbala "Budućnost" Banovići, pod generalnim pokroviteljstvom rudnika "Banovići". Turnir je trajao dva dana, a na njemu su učestvovala 34 ekipe.

Na terenu, ali i na tribinama bilo je vrlo razigrano.

Prvi dan turnira nastupilo je 18 ekipa koje su činili dječaci rođeni 2009. godine, među kojima su se najbolje pokazali mladi fudbaleri iz FK "Radnički" Lukavac, dok je drugo mjesto pripalo Sportskom klubu "Bambi" Tuzla. Treće mjesto u ovoj kategoriji osvojili su domaćini iz FK "Budućnost" Banovići, a četvrto FK "Proleter" Tuzla.

Drugi dan turnira takmičilo se 16 ekipa, a snage su odmjerili dječaci rođeni 2010. godine. U ovoj kategoriji najviše sportskog umijeća pokazali su fudbaleri iz FK "Budućnost" Banovići osvojivši prvo mjesto, dok je drugo mjesto osvojila ekipa SF "Eurogol" Živinice. Dječaci iz fudbalskog kluba "Ilička" Brčko bili su treći, a četvrti FK "Proleter" Tuzla.



RUDAR informativna novina radnika  
RMU "Banovići" d.d. Banovići

[www.rmub.ba](http://www.rmub.ba)

Uređuje Redakcioni odbor:

Samir Numanović, predsjednik  
Amela Kantić, urednica  
Melisa Čaušević, novinar- saradnik  
Fertik Glibanović  
Šalko Gutić  
Šehval Lapandić

DTP i štampa: "OFF SET" Tuzla

Riješenjem Republičkog komiteta  
za informacije broj 04-651-537/77  
od 6.9.1977.

List je uveden u Registar štampe R BiH.

E-mail: [kontakt@rmub.ba](mailto:kontakt@rmub.ba)  
[nadzorni.odbor@rmub.ba](mailto:nadzorni.odbor@rmub.ba)